

Skatterådip aalajangiinera

Suuneranut ilisarnaat:	2012-071093
Aalajangiineq pivoq:	25. oktober 2012
Aalajangiineq tamanut nalunaarutigineqarpoq:	
Ukioq aningaasarsiorfik:	2010
Pineqartoq:	Akilerartarneq
Pineqartup imarisaa:	Illuummik nalikilliliineq

Naalisarnera

Naammagittaalliuut illuutip inissiatut atorneqartup akilerarutitigut nalikillilerneqarneranut tunngasuuvoq. Illuummik piginnittup illuut suliffeqarfimmut piginneqataaffigisimasaminut attartortissimavaa. Suliffeqarfiup illu sulisumi ilaanut attartortissimavaa. Illuut piginnittup nammineq sulisuisa ilaanit inissiatut atorneqarsimangimmat akilerartartup illuummik nalikilliliisinnannginnera Skatterådip aalajangiisimavaa.

Pissutsit suliamut tunngasut

Akilerartartoq X I/S-imik piginneqataasimavoq. Tamanna ilutigalugu aamma inissiaateqaqatigiiffik Z I/S, illuummik X I/S-ip sulisuinit inissiatut atorneqartumik piginnittuusooq piginneqataaffigisimavaa.

X I/S-ip illuutip attartorneranut akiliut inissiaateqaqatigiiffimmut Z I/S-imut akilertarsimavaa. Illua´tunge-riit attartornermut isumaqatigiissusiorsimangillat. X I/S-ip illuut attartukkani sulisumi ilaanut attartortissimavaa.

Inissiaateqaqatigiiffiup sinneqartoorutai piginnittut marluusut agguartarsimavaat. Akilerarutitigut nalikilliliinerit inissiaateqaqatigiiffiup naatsorsuutaasigut pisarsimangillat, piginnittulli nammineerlutik nalunaarsuiffiini toqqaannartumik nalikilliliissutigineqartarsimallutik. Akilerartartup inissiaateqaqatigiiffimmi Z I/S-imi illuut nammineerluni nalunaarsuiffimmini 928.650 kr.-inik akilerarutitigut nalikillilersimavaa.

Akilerartartup isumaa

Akilerartartoq isumaqarsimavoq illuut nalikillilerneqarsinnaasooq, tassami inissiaateqaqatigiiffik Z I/S imminermi akilerartussaataaangilaq, akilerartussaataasulli tassaallutik I/S-ip piginnittui – tassa imaappooq akilerartartoq taassumalu piginneqataa.

X I/S aamma imminermi akilerartussaataaangilaq. Illuut X I/S-imi sulisut inissaattut atugassatut pi-siarineqarsimavoq, sulisunullu inissianik nalikilliliisinnanissamut piumasaqaat taamaalilluni eqquutsineqarsimalluni.

Akilerartartoq X I/S-imi piginneqataavoq, I/S-imilu tassani pigisat tamaasa annerpaamik piginnittuuffigalugit – matumani aamma sulisut. Tassa imaappooq sulisoq inissiaateqaqatigiiffiup Z I/S-ip illuutaani ineqartoq akilerartartup sulisoraa.

Nalikilliliinerit pillugit kaajallaasitami assersuusiunneqarsimavoq illuut arlalinnik piginnittulik, taakkunanngalu ataasiakkaat sulisuminnut attartortitsisut. Tassa imaappoq piumasaqaataangilaq illup piginnittui aamma tassaassasut suliffeqarfimmik piginnittut.

Sulisunut inissaqartitsisinnaaneq aalajangersakkap ammaappaa. Skatterådilli allattoqarfiata isumaa malillugu taamaaliornissaq ajornassaaq. Tamanna ajornartorsiutaavoq, akileraartartormi sulisunik atorfinitsisisuusariaqassammat.

Inatsisini maleruagassanut periaatsinullu innersuussineq

Suliffeqarfik inummit pigineqartog:

Inuk namminersorluni suliffeqarfimmik aammalu selskabi aqutigalugu suliffeqarfimmik ingerlatsisinnaavoq. Suliffeqarfik selskabi aqutigalugu ingerlanneqarpat, selskabip akiitsuni kisimi akisussaaffigisavai, suliffeqarfiullu angusai akileraaruteqaatigisussaallugit. Inuup piginnittup taamaallaat akileraaruteqaatissarai selskabimit iluanaarutisiani, tak. Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi § 14, imm. 1, nr. 3.

Suliffeqarfik namminersorluni suliffeqarfittut (inummit) ingerlanneqarpat, suliffeqarfiup akiitsui piginnittup akisussaaffigisavai, suliffeqarfiullu angusai akileraaruteqaatigisussaallugit, tak. Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi § 14, imm. 1, nr. 1.

Pigineqatigiiffik I/S suliffeqarfiuvoq inunnit arlaqartunit ataatsimoorullugu ingerlanneqartog. I/S imminnermini inatsisitigut immikkoortuuvoq, akileraartarnerli eqqarsaatigalugu inatsisitigut immikkoortutut isigineqarani. Pigineqataasut ataasiakkaat pigineqatigiiffiup akiitsui nammineerlutik nammaqatigiillutilu akisussaaffigaat. I/S-ip sinneqartoorutai piginnittut namminneq aningaasarsiaasa naatsorsorneqarneranni ilanngunneqartussaapput, pigineqataasullu ataasiakkaat I/S-ip pigisaanik nalikillilerneqarsinnaasunik piginnittuussusertik naapertorlugu nalikilliliisinnaallutik. Tak. aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi § 1 aamma § 14, imm. 1, nr. 1.

Inuup ingerlassai tamaasa immikkut nalilersorneqartussaapput, akileraartarneq eqqarsaatigalugu inuussutissarsiutit ingerlassaanersut paasiumallugu. Inuk ingerlassaqarsinnaavoq akileraartarneq eqqarsaatigalugu inuussutissarsiutit inuussutissarsiutaanngitsutullu ingerlassanik. Assersuutigalugu tassaasinnaavoq inuk namminersorluni sanasutut suliffeqarfiutilik, saniatigullu qimminik piaqqiortitsinermik "aliikkutariinnarlugu" ingerlassalik. Ingerlassat tamarmik akileraaruteqaataasussaapput, akileraartarnikkulli assigiinngitsumik suliarineqartussallutik.

Nalikilliliinerit:

Akileraarutitigut nalikilliliinerit aningaasarsiat akileraaruteqaataasussat naatsorsorneranni ilanngaatigineqartarput. Akileraarutitigut nalikilliliisutaasinnaasut annerpaaffissaat tassaavoq namminersorluni inuussutissarsiummik ingerlatsinikkut isertitat annertoqqataat. Tak. Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi § 23 aamma § 24, imm. 1, nr. 1.

§ 23. Inuup § 1, imm. 1, nr. 1 aamma 2 naapertorlugit akileraartussaataasup, imaluunniit § 2 malillugu killilimmik akileraartussaataasup akileraarutigut nalikilliliissutigisinnaasaasa annertunerpaaffigisinnaavaat namminersorluni inuussutissarsiuteqarnikkut aningaasarsiaasa amerlaqataat, akileraartarnermi nalikilliliinerit pillugit Namminersornerullutik Oqartussat nalunaarutaanni malittarisassanut naapertuuttumik, takuuk § 24, imm. 1, oqaaseqatigiit aappaat.

§ 24. Aningaasarsiat akileraaruteqaataasussat naatsorsorneranni ilanngaatigineqarsinnaapput:

1) Ingerlatsinermi aningaasartuutit, tassa imaappoq aningaasarsiat piniarnerannut, isumannaalliniarnerannut allanngutsaaliorniarerannullu ukiup ingerlanerani akissaajaataasimasut, taakkununga ilanngullugit akileraartarnermi nalikilliliinerit. Akileraartarnermi nalikilliliinerit maleruagassiat aammalu pigisat nalikillilerneqarsinnaasut allamut tunineranni il.il. iluanaarutit annaasaqaatilluunniit akileraartarnermut tunngasumik suliarineranni maleruagassat naalakkersuisut aalajangissavaat,

Akileraarutigut nalikilliliinerit pillugit maleruagassat Inatsisartut, Akileraartarnermi nalikilliliinerit il.il. pillugit Namminersornerullutik Oqartussat nalunaarutaanni nr. 30, 1. december 2006-imeersumi aalajangersarpaat.

Illuutit inissiatut atornerqartut, nalunaarummi § 1, imm. 3 naapertorlugu taamaallaat nalikillilerneqarsinnaapput piginnittup suliffeqarfiutaani sulisunut attartortinneqarunik.

§ 1.

Stk. 3. Illuutit inummit pigineqartut inissiatullu attartortinneqartut, kiisalu maskiinat, pequtit assigisaallu, taakua ingerlannerannut atorut nalunaarummi maleruagassiani aatsaat ilaatinneqassapput piginnittup suliffeqarfiutaani sulisunut attartortitsineruppat. Illuut piginnittumit inigineqarpat tamanna sulisumut attartortitsinerut isigineqassanngilaq.

Nalunaarummi § 22 aamma § 23 naapertorlugit aatsaat nalikilliliisoqarsinnaavoq, illuutip naqqata annertussusiata tamarmiusup minnerpaamik affaa sulisunut attartortinneqarpat. Attartortitsineq sulisunut sulisuunngitsunullu attartortitsineruppat nalikillilerneqarsinnaasoq taamaallaat tassaavoq attartortinneqartup ilaa sulisunut attartortitaq. Illuut arlalinnik piginnittoqarpat, taava piginnittut tamarmik illuut nalikillilersinnaavaat, aatsaalli illuutip naqqata annertussusiata tamarmiusup ilaata pigisamik minnerpaamik affaa sulisuminnut tamarmik immikkut attartortikkunikku.

§ 22. Illuutit atorullu ikkussorneqarsimasut il.il. sulisunut sulisuunngitsunullu inissiatut attartortinneqartut pissarsiarineqarneranni nalingi, illuutip ilaata piginnittut ataasiakkaat sulisuinut attartortinneqartup aamma illuutip naqqata annertussusiata tamarmiusup piginnittumit pigineqartup imminnut nikinganerannut naleqquttut, ukiumi pissarsiarineqarfianni aningaasarsianit akileraaruteqaataasussanit ilanngaatigineqarsinnaapput, takuulli § 16.

Imm. 2. Pissarsiarineqarnerani nalingata ilaa, illuutip tamarmiusup ilaata piginnittut ataasiakkaat sulisuinut attartortinneqartup aamma illuutip naqqata annertussusiata tamarmiusup piginnittumit pigineqartup imminnut nikinganerannut naleqquttoq, ukiumi pissarsiarineqarfiani tamakkiisumik ilanngaatigineqanngippat, taava taassuma ilaa nalikillilerneqarsimanngitsoq ukiumi tullermi kingusinnerusumiluunniit ilanngaatigineqarsinnaavoq.

Imm. 3. Ukiumi aningaasarsiorfiusumi pineqartumi piginnittut ataasiakkaat illuutaata naqqata annertussusiata tamarmiusup minnerpaamik affaa piginnittut ataasiakkaat sulisuinut attartortinneqarsimappat nalikilliliineq aatsaat pisinnaavoq.

§ 23. § 1, imm. 3-mi maleruagassiaq apeqqutaatinnagu, illuutit sulisunut sulisuunngitsunullu attartortinneqartut taamaallaat ukiumi aningaasarsiorfiusumi pineqartumi nalikillilerneqarsinnaapput, piginnittup pigisaata minnerpaamik affaa ukiup aningaasarsiorfiusup ingerlanera tamaat piginnittup sulisuinut attartortinneqarsimappat. Taamaassimappat taassuma annertussusianut naleqquttumik nalikilliliisoqarsinnaavoq.

Tassa imaappoq, illuut 1000 kvm-iusoq qulinik piginnittoqarpat, taava piginnittut ataasiakkaat minnerpaamik 50 kvm-i sulisuminnut inissiatut attartortikkunikku nalikilliliisinnaapput. Pisiarinerani akiata affaannaa piginnittumit nalikillilerneqarsinnaavoq, tassami affaannaa siunertamut nalikilliliissutigineqarsinnaasumut atorneqarmat.

Skatterådip naliliineri tunngavilersuutaalu

Akilerartartoq I/S-imi marlunni piginneqataavoq. I/S-it taakku marluk inatsisitigut, assersuutigalugu illuummik attartortitsineq pillugu isumaqatigiissusiorsinnaallutik immikkut inissisimapput. Tassa Z I/S illuummik X I/S-imut attartortitsinissani, taassumalu illuummik sulisuminut atugassanngortitsisinnaanera pillugit X I/S-imut isumaqatigiissuteqarsinnaavoq, I/S-it taakku marluk suliffeqarfittut immikkoortutut isigineqassapput, tassa suliffeqarfiit angusaat tamaasa immikkut naatsorsorneqassallutik piginneqataasunullu agguataarneqassallutik, taakku angusat akileraaruteqaatigisussaammatigit.

Tassa imaappoq illuut nalikillilerneqarsinnaanngilaq, tassami Z I/S-imi sulisumut attartortinneqaranni luunniit atugassiissutigineqannginnami. Z I/S sulisoqarsimasuuppat I/S-ip illuutaasa arlaanni ineqartumik, taava tamaaliornissamut piunasaqaatit allat aamma naammassineqarsimappata illuut taanna nalikillilerneqarsinnaasimassagaluarpoq. Taamaattoqarsimasuuppat akilerartartoq nalikilliliisinnaasimassagaluarpoq, tassami inissiaateqaqatigiiffimmi piginneqataasutut angusat ilaannik pissarsiani akileraaruteqaatigisussaassagamigit, taamaalillunilu pigisat ilaannik piginnittuuffigisaminik nalikilliliisinaatitaassalluni. Aamma assinganik X I/S-ip illuut pisiarisimasuuppagu, X I/S-illu sulisuinut inissiatut atorneqarluni, taava akilerartartumit nalikillilerneqarsinnaasimassagaluarpoq. Kiisalu illuut akilerartartumit pisiarineqariarluni X I/S-imi piginneqataassutitut atorneqarsimasuuguni aamma nalikillilerneqarsinnaasimassagaluarpoq. Kisianni taamaassimagaluarpat akilerartartup nalikillilersinnaasaa tassatuaassagaluarpoq illuutip ilaa nammineq pigisaa, tassami illuut I/S-imi piginneqataasut allat peqatigalugit "agguarneqassagaluarpat.

Skatterådip aalajangiinera

Akilerartarnermut Aqutsisoqarfiup aalajangiinera Skatterådip aalajangiusimavaa. Akilerartartup Z I/S-imi illuutip akilerarutitigut nalikillilerneqarneranik ilanngaateqarsinnaanera itigartitsissutigineqarpoq, tassami akilerartartup sulisuinut imaluunniit Z I/S-ip sulisuinut inissiatut atorneqanngimmat. Tak. Aningaasarsianit akilerarutit pillugit Inatsisartut inatsisaanni nr. 12, 2. november 2006-imeersumi §§-it 23 aamma 24 aammalu Akilerartarnermi nalikilliliinerit il.il. pillugit Namminersornerullutik Oqartussat nalunaarutaanni nr. 30, 1. december 2006-imeersumi § 1, imm. 3 aamma § 22.